

29/12/1999

Malaysia tidak bekal senjata

KUALA LUMPUR, Selasa - Malaysia tidak membekalkan senjata kepada mana-mana kumpulan pemisah Aceh atau pergerakan pemberontak lain di Indonesia, kata Menteri Luar, Datuk Seri Syed Hamid Albar.

"Malaysia tidak mencampuri hal ehwal dalaman negara lain, jauh sekali menjadi pembekal senjata kepada mana-mana kumpulan pemisah di Indonesia," katanya.

Sebaliknya, beliau menegaskan, Malaysia berpendirian bahawa kedaulatan Indonesia perlu dipertahankan.

"Pendirian kita ialah Indonesia perlu dipertahankan supaya wilayahnya tidak berpecah-pecah," katanya kepada pemberita selepas menghadiri program 'Wawancara' di Angkasapuri, di sini hari ini.

Syed Hamid turut merujuk kepada pertemuan Presiden Indonesia, Abdurrahman Wahid dengan Datuk Seri Dr Mahathir Mohamad, awal bulan lalu.

Dalam pertemuan itu, katanya, Perdana Menteri menyuarakan harapan kepada Abdurrahman supaya Aceh terus bernaung di bawah Indonesia.

"Abdurrahman meminta Malaysia menjadi orang tengah untuk merapatkan jurang antara pemisah Aceh di sini dengan Indonesia. Kita sedia melakukannya tetapi terpulang kepada Indonesia mengenai caranya," katanya.

Berikutan itu, beliau meminta media berhenti melaporkan perkara yang boleh menyinggung hubungan dua hala Malaysia-Indonesia, lebih-lebih mengenai sesuatu yang sukar dipastikan kesahihannya.

Minggu lalu, agensi berita asing mendakwa, pemisah Aceh mendapat bekalan senjata dari Malaysia.

Syed Hamid juga berkata, pemimpin Timor Timur tidak lagi memandang serong pembabitan Malaysia dalam proses pembangunan wilayah itu selepas kemerdekaannya dari Indonesia.

Malah, katanya, wakil pemimpin kemerdekaan Timor Timur, Xanana Gusmao, berhasrat melawat negara ini.

"Sikap mereka semakin berubah, lebih positif dan memahami peranan Malaysia di Timor Timur. Mungkin itulah sebabnya Gusmao bertanya sama ada kita menerima hasratnya melawat Malaysia.

"Kita dapat perutusan dua minggu lalu bahawa beliau bertanya kemungkinan melawat Malaysia sejajar dengan siri lawatannya ke beberapa negara Asean.

"Saya berkata, kita terima tetapi buat masa ini, tidak ada sesuatu yang ditetapkan, masih pada peringkat bertanya," katanya.

Syed Hamid berkata, pemimpin Timor Timur tidak lagi bercakap bahawa mereka sebahagian Pasifik tetapi mengakui kepentingan mereka terletak di dua rantau iaitu Asia dan Pasifik.

Menurutnya, Malaysia yang mengamalkan dasar terbuka dalam hubungan antarabangsa berharap kedatangan Gusmao memberi peluang kepada kedua-dua pihak bertukar fikiran bagi faedah bersama dan serantau.

Syed Hamid berkata, sebelum ini imej negara tercemar kerana ada pihak tertentu cuba memburukkan nama Malaysia hingga pemimpin Timor Timur menganggap negara ini tidak bersimpati dengan perjuangan mereka.

"Ramai orang salah tafsir mengenai pendirian Malaysia mengenai Timor Timur, seolah-olah cara Malaysia menangani Timor Timur berbeza cara kita bertindak dalam isu antarabangsa di Kosovo, Bosnia atau Somalia, katanya.

(END)